



Draga braćo u imanu i islamu.

Uzvišeni Allah kada je stvorio čovjeka te mu odredio gdje će da živi, čime i kako da se koristi, ujedno mu je odredio i stalnog neprijatelja koji će da ga prati kroz njegov život i koji će pokušavati da ga odvрати od pravog puta. Taj neprijatelj je svima nama dobro poznat i zove se Iblis, prokleti šejtan.

Kazivanje o tome kako je postao proklet je svima nama dobro poznato, međutim da li znamo da šejtan kako ima svoje neprijatelje da ima i svoje prijatelje, svoje ahababe. Danas ćemo upravo govoriti o onima koji su šejtanovi neprijatelji, jer su dragi Allahu i o šejtanovim prijateljima koji su dragi šejtanu.

Vehb b. Munebbih, radijallahu anhu, prenosi: Milostivi Allah je naredio Iblisu:

-Idi mom Poslaniku i reci da ćeš istinito odgovarati na sve što te bude pitao! Nakon ovoga prokleti šejtan dođe kod Allahovog Poslanika sallallahu alejhi ve sellem. U ruci je držao jedan štap gvozdene vrha, a on sam je bio u liku starca.

Milost svjetovima, naš Poslanik sallallahu alejhi ve sellem, ga je upitao:-Ko si ti?

Starac odvratio lica odgovori: -Ja sam Iblis!

-Zašto si došao?

-Poslao me je tvoj Gospodar. Naredio mi je da ti ispravno odgovorim na sve ono što me pitaš.

Znamo da od šejtana nema nikakvog dobra, ali Allah mu je naredio da bude iskren kako bi naš ummet dobio pouku i kako bi znao ko su njegovi prijatelji, a ko neprijatelji.

Zatim Poslanik s.a.v.s., upita:-O, prokletniče, koliko imaš neprijatelja u mom ummetu?

Šejtan počeo brojati te ih izbroja jednog po jednog i bez ustručavanja reče:-Trinaest!

Allahov Poslanik, s.a.v.s., se zainteresovao:-Reci, ko su oni?

Iblis započeo:-Prvi si ti, o Allahov Poslaniče!

Pogledajmo, Poslanik a.s., mu je bio i ostao najveći neprijatelj. Inače svi Poslanici su bili velika prepreka šejtatanskom djelovanju, zato ih je Iblis najviše mrzio.

Zatim šejtan dalje nastavi nabrajati sve one koje ne voli i koje smatra svojim neprijateljima te reče:

-Poslije tebe moj neprijatelj je: pravedan vladar.

Znao je prokletnik da ondje gdje vlada nepravda da tu ima i grijeha. Ondje gdje se vlada po Allahovom zakonu započevši prvo od vladara koji se boji Allaha, tu su ljudi bogobožni i tu je daleko manje grijeha.

Poslije njega šejtan spomenu sljedeće neprijatelje: skroman bogataš, trgovac koji istinu govori, učenjak koji se mnogo boji Allaha, vjernik koji savjetuje druge, musliman koji posjeduje merhametli srce, pokajnik koji ustrajava na svom pokajanju, osoba koja se čuva harama, vjernik koji se lijepo ophodi prema ljudima, vjernik koji je od koristi ljudima, hafiz koji uvijek uči Kur'an i ophodi se po njemu, osoba koja u noći ustaje i klanja namaz dok ostali insani spavaju.

Eto, to su moji neprijatelji unutar tvoga ummeta! – reče prokleti šejtan.

Kada pogledamo sve ove navedene kategorije ljudi vidjećemo da su to ljudi koji teže Allahovom zadovoljstvu te su zbog toga postali Allahu dragi. Zamislimo samo bogataša kojeg njegov imetak ne čini silnim i oholim, nego ga čini skromnim. Ili trgovca koji samo istinu govori, koji treba robu prodati a ponekad i mahane iznijeti. Koliko imamo danas takvih? Najbolji nam je primjer kada kupujemo auto. Upitaš trgovca o osobinama auta, a on nam kaže kako je to auto „iz prve ruke“, bez ikave štete na limu ili motoru i tek kada ga kupimo onda ustanovimo da nam trgovac nije istinu govorio.

Navodi se da je imam Ebu Hanife koji je bio veoma dobar trgovac ostavio svog pomoćnika da mu prodaje robu. Nakon što se Ebu Hanife vratio ovaj mu se pohvalio kako je prodao neku robu po određenoj cijeni. Ebu Hanife mu reče: A jesi li ga upoznao sa mahanom te robe? Reče:-Nisam. Daj mi onda taj novac ja mu ga moram vratiti. Kada je našao čovjeka reče mu da ta roba ima mahanu i da je previše za nju platio, pa ako hoće da je vrati a on će mu pare vratiti. Pogledajmo koje poštenje.

Nakon što je Poslanik a.s., saznao ko su šejtanovi neprijatelji upita ga:

-Ko su ti prijatelji i pomagači iz mog ummeta?

Šejtan kaza ovako:

-Ima ih deset grupa, Allahov Poslaniče!

-A ko su oni? –upita ga Poslanik?

Šejtan mu odgovori:

-Okrutan vladar, oholi bogataš, lažljivi trgovac, pijanica, žene koje pjevaju pjesme, osoba koja čini zinaluk, oni koji jedu imetak jetima, oni koji napuste namaz ili oni koji su nemarni prema namazu, oni koji ne daju zekat ili oni koji sprečavaju njegovo davanje, i još oni čija je žudnja dugoročna. Eto, ovo su moji prijatelji iz tvog ummeta!

Maločas smo spomenuli da je pravedan vladar šejtanov neprijatelj, a s druge strane zulumčar i okrutan vladar mu je prijatelj. Prisjetimo se samo raznih okrutnih vladara kroz historiju gdje je za vrijeme njihove vladavine zemlja bila ispunjena nasilljem i nepravdom, a poznato nam je da Allah ne voli nered-fesad. U istu kategoriju ulazi i oholi bogataš koji se šepuri svojim bogatstvom pred drugima, uzdiže se oholi, dok druge podcjenjuje i omalovažava. Zatim tu dolazi i lažljivi trgovac koji će sve učiniti samo da svoju robu proda.

Pored njih u ovu kategoriju ulaze i žene koje pjevaju pjesme. Kada se tome još pridoda sve veća razgolićenost među ženama kao i nemoralan tekst pjesama biva nam jasno zašto ih šejtan ubraja među svoje prijatelje.

Poslanik je naveo da i ona osoba koja čini zinaluk je šejtanov prijatelj, jer tim činom nestaje morala iz društva, kvari se naša omladina, brak prestaje biti interesantan, zapada se u grijeh iz kojeg je veoma teško izaći. Poslanik a.s., je napomenuo da onaj koji čini zinaluk u tom momentu Allah uzdigne iman iz njega sve dok ne prestane sa tim činom.

I oni koji jedu imetak jetima ulaze u kategoriju šejtanovih prijatelja, kao i oni koji ne klanjaju ili ne daju zekat.

Ako uzmemo samo one koji nikako ne klanjaju onda šejtan ima mnogo svojih jarana. Po nekim statistikama samo oko 36% muslimana redovno klanja, neki to čine povremeno od petka do petka, neki od ramazana do ramazana, a neki od bajrama do bajrama.

Pametn insn je onaj koji uzima pouku iz neprijateljevih riječi, a šejtan je od glave do pete čovjekov neprijatelj. Da bi se izbjegle njegove zamke, potrebno ih je upoznati kao i puteve i načine na koje nam šejtan pokušava prići.

Molim Allaha da nas sačuva od prokletog šejtana kao i našu djecu i naše porodice. Molim Allaha da nas učini njemu dragim, a šejtanu mrskim. Amin.